

Anugerah negara

SETELAH menerajukan negara selama lima tahun enam bulan dan dua hari, hari ini bersaralah Datuk Hussein Onn dari jawatan Perdana Menteri. Dalam masa sesingkat itu Datuk Hussein Onn telah meninggalkan jejak yang jelas di pantai sejarah pembangunan negara. Jika Allahyarham Tun Abdul Razak telah menerajukan negara keluar dari kancas perpecahan dan huruhara serta mengasaskan landasan bagi impian kemajuan yang terjamli dan seimbang melalui Dasar Ekonomi Baru, Tuhan telah meniadakan Datuk Hussein yang harus memastikan pelaksanaannya. Allahyarham Tun Razak meninggal dunia pada 14 Januari 1976 dan semenjak itu, dengan ketelitian dan ketegasan seorang tentera, keluhuran seorang peguam dan semangat seorang pejuang kebangsaan, Datuk Hussein bersama pemimpin-pemimpin lain telah berusaha menjelmakan impian itu. Sesungguhnya kejayaan beliau amatlah besar. Baik dalam pembangunan material mahupun mental, hasil DEB telah amat dirasakan sekarang ini. Beliau telah memilih dengan teliti menteri-menteri yang bertanggungjawab terhadapnya dan memberi mereka segala kebebasan serta sokongan untuk menggerakkannya sepenuhnya. Dalam proses ini beliau telah memperkemas serta memperjelas beberapa kelonggaran serta kesamaran dalam dasar tersebut.

Untuk mencapai segalanya ini memerlukan bukan saja kualiti peribadi seperti yang dimiliki Datuk Hussein malah sokongan dari pemimpin-pemimpin utama yang lain. Di sini juga ketokohan dan visyen beliau telah terbukti. Pemilihan Datuk Seri Dr. Mahathir Mohamad sebagai Timbalan Perdana Menteri, selain telah membuktikan keupayaannya untuk mendokong tugas yang maha berat itu telah juga berjaya mendapatkan penerimaan yang menyeluruh dari UMNO dan Kerajaan. Dengan demikian tapak telah tersedia dan proses peralihan kuasa dapat dirancang dan dilaksanakan dengan licin. Dari satu segi lain tindakan Datuk Hussein memilih waktu dan suasana yang sesuai untuk mengundurkan diri dan meletakkan kuasa secara terancang ke bahu pengganti yang layak dan diterima umum adalah suatu ciptaan tradisi yang boleh menjadi tauladan yang baik untuk tokoh-tokoh yang akan datang. Kerana ketokohan dan sumbangan Datuk Hussein Onn yang begitu besar, maka memang wajarlah anugerah Diraja Pangkat Pertama Darjah yang Mulia Pangkuan Negara Bintang Seri Maharaja Mangku Negara (SMN) yang membawa gelaran Tun dikurniakan kepada beliau sebagai penghormatan masyarakat yang tertinggi terhadap sumbangan yang cemerlang kepada negara.

Bahan asal dari Arkib